

Multiculti, i lingac dla musiga

Les beles esperiënzes dl cor da Viena "cantus iuvenis" che cianta inçe por ladin va inant. Le cor sarà da aldi tosc inçe a Bornech, olache i ciantadus y les ciantarines saludarà la bela sajun cun n program ligherzin y de gran varieté



Le cor "cantus iuvenis" sot la direziun de André Comploi.

Çiant - Melodia y ritm é dessigü i elemënc plü relevanc tla musiga, mo inçe les parores à súa importanza. Le cor "cantus iuvenis" cianta te n grôm de lingac y dialec, che le cor internazional baia inçe: tröc di ciantadus y dles ciantarines stüdia val' lingaz. Y feter vigni ann röiel pormez cianties te lingac o dialec nüs. Por ladin vëgnel bele ciantè da n grôm d'agn. Chësc ann à le cor imparè ite la ciantia "Der Weaner geiht net unter", tl dialet da Viena. Chi che sa, sciöche le "vieneje" sona, po bele s'impensè tan da ri ch'ara va pro dales proes, canche un da Viena proa da i insignè ai atri, sciöche les parores mëss gni pronunziades...

Nota "ezelënt"

Le cor "cantus iuvenis" é metü adöm da plü co cincanta jogn y jonnes che vir a Viena, mo che vëgn dal'Austria, da Südtirol, dala Germania, Ungaria o dal Luxemburg. Vigni ann à le cor "cantus iuvenis" ciantarins nüs. Studënc vëgn pormez y s'un va indò - sciöche i studënc da foradecà, che é ma por n semester o dui a Viena y che vëgn empò conscidrà n gran arichimënt por le cor. D'atri s'un va canch'ai röia de studié, n valgügn resta inçe inant do avèi stlüt jö sù stüdi. Che chësc jì y gni ne ti fej nia mal ala cualité dl ciantè, desmostra le livel alt dl cor, che po dessigü se mosoré cun i mius cors amatoriali. Le cor sot ala direziun de André Comploi da Mantëna l'à porvada fora l'ann

passè, tolon pert al concurs dl ORF "Österreich singt", olache al à cïafè la nota "ausgezeichnet".

Repertoire sacral, mo nia ma

Le cor, gnü metü sö dl 2003, po mostrè sö na gran ativité a Viena, olache al cianta mësses y tin conzeré tles dljies plü importantes, vigni ann conzeré pro le festival "Internationales Adventsingen im Wiener Rathaus" y pro la "Lange Nacht der Kirchen". "cantus iuvenis" cianta a capella, mo inçe cun orchestra (Mozart: "Spatzenmesse", Haydn: "Kleine Orgelsolomesse", "Heiligmesse", Telemann: "Tageszeiten") y à bele tignì conzeré tl'Austria (Oberösterreich, Kärnten, Niederösterreich), mo inçe a Budapest - y deplü iadi é le cor "cantus iuvenis" inçe bele stè tla Val Badia y a Bornech a ciantè, ti ultims agn tres d'Advënt.

Conzert a Bornech

Chësc ann nes presènta le cor da Viena n program nia sacral, mo de musiga ligherzina y de gran varieté, che à cïafè le titul "Multiculti" por via di grôm de lingac che vëgn dant tl program. Tla musiga ó "lingaz" inçe di "stil". Vigni epoca dla storia dla nusiga à n ater lingaz, che cïafa lerch tl program. Lingac desvalis à inçe de un n vers la musiga popolare y dl ater vers la musiga moderna. Bele nosta musiga popolare cïafa

n lingaz desvali por vigni situaziun y cïafa le dër tonn por ciantè de aurela cörta ("Zu guater Stund a Liadl"), por na bela detlaraziun d'amur ("Bist du net ba mir"), o por l'incherscimun ("Mia cïasa"). Mo "multiculti", le motto de nosc program, reverda dandadöt la proveniënza dles cianties. Ares vëgn da döt le monn. Ales ès, ch'an alda sènan tla ciantia ladina "Les flus de munt", ti respogn "El grillo" de n madrigal franzeje de Josquin Desprez. Dala buna lóna dla ciantia taliana "Funiculi funiculà" passunse ai ritms cialé d'America latina ("Sway", "Besame mucho"). Cinamai tla Svezia rovarunse - cun les plü beles ciantes di ABBA te n alestimënt por cor moscedè.

Les ciantarines y i ciantarins, danter chisc inçe deplü ladins, röia por la sesta ota te Südtirol y invieia - sot la direziun de André Comploi da Al Plan de Mareo - a n conzert d'aorela cörta olache al gnarà presentè tòc fora por les epoques, stii musicaì y lingac: dala renaissance al 21ejim secul, da musiga tlassica a cappella cina ai ABBA, musica Latino y cianties populares - por todësch, talian, inglesc, spagnol, svedesc y sambëgn por ladin.

Le conzert sarà da aldi en sabeda, ai 9 de jügn 2012, dales 20.30, tla Cïasa Ragen a Bornech. L'entrada sarà debann, na spënora de buna man sarà bëgnodüda. Informaziuns plü monüdes: www.cantusijuvenis.at

Matteo Rubatscher